

54-bob. Bojxona ishida axborot-kommunikatsiya texnologiyalari

378-modda. Bojxona ishida axborot-kommunikatsiya texnologiyalaridan foydalanish

Bojxona ishi, qoida tariqasida, axborot-kommunikatsiya texnologiyalari asosida amalga oshiriladi.

Yuridik yoki jismoniy shaxslar, shu jumladan chet ellik shaxslar bojxona ishida boshqa davlat organlarining axborot tizimlari bilan o‘zaro hamkorlik qiluvchi bojxona organlarining axborot tizimlaridan foydalanishi mumkin.

Bojxona ishida axborot-kommunikatsiya texnologiyalaridan foydalanish axborot xavfsizligi talablariga rioya etilgan holda amalga oshiriladi.

379-modda. Bojxona ishida foydalaniladigan axborot resurslari

Bojxona ishida foydalaniladigan axborot resurslari bojxona organlarining axborot tizimlarida yaratiladigan, ishlov beriladigan va to‘plab boriladigan ma’lumotlar bazasini o‘z ichiga olgan hujjatlashirilgan axborotning tashkil etilgan majmuidir.

Bojxona organlarining ixtiyorida bo‘lgan axborot resurslari ochiqdir va ulardan hamma erkin foydalanishi mumkin, bundan ulardagi axborotdan foydalanish qonun hujjatlariga muvofiq cheklangan hollar mustasno.